

四明叢書

張宗祥

讀易一鈔

易餘

四明張氏釣園開雕

序

易之爲書理哲而事該三古聖人所盡心歷秦火而不絕視他經爲獨完自漢以來講明傳釋之者無慮千百家而經旨猶未大明于世何也易有聖人之道四曰象辭變占而諸儒或各主其一端又或持易以通己之說漢易家則務象數象數誠易之本也其流爲讖緯蔽于支誕則失之遠矣王輔嗣出倡言忘象程伊川本之遂開義理說易之風易雖卜筮書實寓憂患之思教戒之旨人事固不得而略於是李光楊萬里諸氏又務以人

事說易夫象數義理人事皆易之蘊也必究明象數根
極義理而證以人事然後爲得易之全余論易向持此
說讀古人說易之書必據此以斷其得失當明之末有
董次公先生受業黃石齋先生之門以儒學起吾鄉尤
邃于易所著有讀易一鈔易餘四卷余求而讀之乃頗
能兼究象數義理人事三者之旨又往往采古逸說著
之尤深致意易理分析象辭變占而會之象數義理人
事雖無意于著書第就其所聞見者筆錄焉爲學易者
之津逮而深思好學于此已得一斑其後謝山所著讀

易別錄多所取資是豈可不傳乎亟取此書刊之其二
鈔猶未得也至先生所著春秋簡秀集余得其鈔本藏
之久矣其傳深得體要其論則非先生筆也意者門弟
子集合而成者乎文辭淺陋無當大雅猶未敢遽付剞
劂也因竝及之是爲序民國二十年八月後學張壽鏞
序

董戸部守諭傳

全祖望撰

董守諭字次公學者稱爲長嘯先生諸生世登子也少與嘉定婁唐諸子善受業石齋先生之門天性亢直不肯苟與人同大類石齋其爲詩古文詞排真邊幅之外亦類石齋天啓甲子舉人七上公車不第而學日進名日盛是時吾鄉四孝廉並與東林桴鼓相應然文虎履安道最廣天鑑稍介而謬謬巖巖無出先生之上者東江初建戸部尙書李公白春薦先生綰貴州司事時方議分地分餉正兵盡擢正餉義兵自求義餉先生爭以

爲不可請以浙東正供悉歸戶部覈兵而後給餉覈地而後酌給之先後若義餉雖有其名不可爲繼以給義兵是散遣之也而正兵所食過多且日驕王以爲然然方王諸將不可戶部邵之詹乃調停之卒從原議先生歎曰江上從此潰矣先生本文士顧會稽出納其才甚精江上賴之都御史林公繭庵歎曰嗟乎使次公得可爲之時豈不足當蕭相國關中一席哉已而王之仁無厭請稅漁舟先生謂其客曰今所恃者人心耳科及漁舟其細已甚民弗堪也之仁不害已而又請塞鄣之萬

金湖以爲田又請行稅人法公力爭之已而又請沒籍
大戶祀田以充軍餉令其卒抽刃計司之門以待覆公
固持不可之仁大怒謂盈朝大臣尙不敢裁量我輩何
物豎儒倔強乃爾上言得孟軻百不如得商鞅一旦折
簡召之或言將召之至而殺之王雖知先生之忠而無
若之仁何陰令避之先生曰命吏生死聽於主上悍卽
雖強豈所畏哉卒不往之仁亦中愧而止於是先生直
聲震於江上王以先生任經筵兼起居明年三月十九
日疏請哭臨朝堂三軍縞素從之杭人陸大行培王同

知道焜並殉節廷議賜諡不及道焜先生曰諸公殆以
道焜非進士耶今之進士而賣國者累累也乃諡節愍
東江內附先生行遯江許朝夕涕洟有慰之者輒告之
曰吾不能從汪長源陳木叔同遊尙何顏立人世又曰
此生殆當如曹蜍李志狐貉啖盡其爲詩歌徧哭所知
之死國者淋漓悲愴令人不能自勝是時海上未靖柳
車過從日在島嶼之閒先生不惜傾家助之以是盡落
其所有若當道諸公雖募名請謁無一得見者辛卯張
太保鯢淵之孫以俘至監司王爾祿需先生一言乃許

釋之先生不得已爲言之此二十年中破例一出也甲辰卒得年六十有九縣令張幼學赴弔歎曰名可得聞身不可得而見也先生精於易所著有讀易一鈔二鈔卦變考略易韻補遺春秋簡秀集公車錄晚年取江陰黃介子圖中讀史詩箋之其擘蘭諸集手書裝潢成帖極精所作樂府卽匪風集也子道權別有傳

讀易一鈔易餘卷第一

明鄧董守諭次公撰

上經

卦字解

孔穎達曰卦者掛也掛之於壁也蓋懸物之杙也諸儒皆用其說无有他解予以爲非杙則可掛于壁易豈可掛于壁乎卦者圭也古者造律制量六十四黍爲一圭則六十四象總名爲卦可也應劭曰圭者自然之形陰陽之始卦者亦自然之形陰陽之象其爲字也從卜爲

義從圭爲聲亦兼義也古文圭亦音卦今掛字從手爲義從圭爲聲則圭卽音卦可證矣

卦爻名義

易者廬蟻之名守宮是矣

守宮卽蜥蜴也與龍通氣故可禱雨與蚪同形故能嘔電

也身色无恆日十二變是則易者取其變也彖者茅犀

之名豨神是矣

豨亦曰茅犀狀如犀而小角善知凶吉交廣有之土人名曰豨神

犀形

獨角知幾知祥是則彖者取于知也象大荒之獸也人

希見生象也按其圖以想其形名之曰像故□□□從

人于象也孔穎達曰卦者掛也掛之于壁也蓋懸物之

杙也水經云交者交疏之窗也其字象窗形今之象眼窗也一窗之孔六十四六窗之孔凡三百八十四也所取于交者義取于旁通所取於卦者懸有大小也

乾坤

新書曰易之乾坤皆慎始敬終大戴禮記又作易之乾
《春秋之元詩之關雎禮之冠婚易之乾坤皆慎始敬
終云爾

潛龍亢龍

賈誼曰龍也者人主之辟也亢龍往而不返故易曰有

悔悔者凶也潛龍入而能出故曰勿用勿用者不可也
龍之爲神也其惟茲能乎能與細細能與巨巨能與高
高能與下下吾故曰龍變无常能幽能章

潛龍履霜

乾初九復也潛龍勿用卽閉關之義坤初六姤也履霜
堅冰至卽女壯之戒

潛龍惕躍

龍之潛亢不獲其中矣是以過中惕不及中則躍其近
於中乎

揚雄法言

乾乾蹇蹇夬夬坎坎

宋沈括曰終日乾乾兩乾字當爲兩句上乾知至至之下乾知終終之也王臣蹇蹇兩蹇字爲王與臣也九五六二王與臣皆處蹇中王任蹇者也臣或爲冥鴻可也六二所以不去者以應乎五故也則六二之蹇匪躬之故也後人又改蹇蹇字爲蹇以蹇蹇解諤諤尤爲訛謬君子夬夬夬夬一義也以義夬其外勝己之私于內也凡卦名而重言之皆兼上下卦如來之坎坎是也先儒多以爲連語如兢兢啞啞之類讀之此誤分其句也又

履虎尾咥人凶當爲句君子則夬夬矣何咎之有況于凶乎自天祐之吉當爲句非吉而利則非所當祐也

乾乾夬夬謙謙坎坎蹇蹇

乾乾夬夬皆九三重剛也謙謙初六居下卦之下也坎坎六三居重險之間也蹇蹇六二陰居陰也

乾乾坎坎

王景孟曰乾之三處二乾之間故曰終日乾乾坎之三處二坎之間故曰來之坎坎

夕惕若厲